

欽定續文獻通考

第四
卷八

封建考

臣等謹按古封建之制自漢而還漸乖其舊去古日遠規模盡易然歷代帝王子弟多膺封爵非惟重天潢之支派亦尚有屏翰王室之義焉若異姓公卿間立五等然生前晉錫爲涖歷之官階身後褒崇乃恩加之卹典絕非封建初意是以馬端臨考敘唐封建止及諸王而凌煙功臣封公侯者更不敘錄顧考屢朝異姓世襲之封亦有不可全削者但不當如王圻續通考之漫無別白耳馬端臨於宋代事跡纂至寧宗亦不載異姓一人王圻起而續之增載寧宗以後異姓及外戚封爵數十人前無所承甚乖體例又以魏了翁文天祥二公之議立藩鎮一門冀以續唐代藩鎮之例空言何足以當實事歟又以李璫陳日照二人立外國封爵不知李璫倏南倏北反覆無常且其所據之地實在中原不可以云外國安南僻在南徼之外自王其國雖受冊封不足以云封建贅此二門尤爲舛謬今所續纂於宋代則全準馬端臨之例王圻所增概爲削去遼金而下四朝則同異姓並載一以生前之實膺封號者爲據其追封加贈者卽屬皇子亦止從附注概不列入正文

馬端臨於歷代皇子追贈國號者多採列王圻凡遼年追贈者悉登載今

則皆更其例

或一人之身生旣封而歿又贈者亦止以所封爲正庶乎得循名核實之義焉總而論之遼之東丹制度

畢具屹然各樹一國元則幅幘廣遠諸王出鎮之地胥能總其軍賦辟置官僚明之諸王亦皆出就藩封給以護衛是皆有古者封建之餘意然不靖之徒迭生事端其弊亦根乎此餘則徒擁虛號取給於食邑之戶而已此則四朝封建之大略可按籍而稽者也

宋秀王後嗣封

太祖第四子秦康惠王德芳五世孫曰子儋子儋之子曰伯琮卽孝宗孝宗既被選入宮立爲太子紹興中贈子偁太師中書令追封秀王長子伯圭襲自伯圭傳子師馬凡三襲封師馬薨在寧

宗嘉定十六年具見前考
師岳靈宗嘉定七年嗣封
師彌理宗寶慶元年嗣封
與澤當是寶祐六年師彌後嗣封紀文未詳
與罕當是咸淳七年十月封紀未詳

濮王後嗣封太宗第三子商王元份之子曰允讓英宗本生父仁宗嘉祐四年贈太尉中書令追封濮王
不燬理宗寶慶元年嗣封

不擅理宗寶慶元年嗣封
善珊理宗寶慶元年嗣封
善奐理宗寶慶元年嗣封
善騰理宗寶慶元年嗣封

臣等謹按馬端臨考載嗣秀王者至師禹而止嗣濮王者至不浚而止宋史秀王濮王傳亦至此二人而止今據

帝紀并參王圻續通考續載之如右

沂王後嗣封徽宗子欽封翼國公
貴謙理宗近蜀寶慶三年命繼沂王後

榮王後嗣封太祖曾孫從式初封安定郡王後追封榮王
與芮理宗同母弟淳祐元年嗣

王封福昭會孫世清為嗣自世清傳至伯澤凡二十一襲封具見前考

益國公憲度宗子咸淳五年封六年薨

臣等謹按憲為度宗子從本紀載之紀又有咸淳四年子鏗生未見有封號故不列再考帝紀理宗紹定三年追

封皇子緝永王繹昭王係追封嘉熙四年子壽國公薨景定三年皇孫資國公焯薨皆一見於紀文而無可詳考

故亦不列至王圻續通考又載希澤至善湘等數人雖皆宗室然由進士起家而歷官以得封號非親王及皇子

可比通考例皆不載故竟削去又按馬端臨考宋代親王載至寧宗之世厥後天屬寡少求之紀文僅得如上

所列諸人已為續載又端臨於宣祖太祖太宗之傳系其親王之子孫襲爵贈爵者附載各王之下今以史傳參

考每多缺略同異如秦王元美十子惟德文於慶厯間特封東平郡王餘德恭等九人皆止封公侯或身後追贈

端臨既已全列則德鈞之子承簡襲封徐國公德雍子承亮襲封昌國公至熙寧二年改承亮為秦國公德文子

承顯亦以王後襲封康國公其後克愉與叔牙嗣焉此秦王後裔所宜詳述者魏王德昭之裔惟忠子從信卒以
惟忠之孫從恪之子世規襲封崇國公端臨並闕焉惟吉之子守節守節之子爲世永世延世延贈彭城郡公端
臨載之而世永身襲邢國公之封後贈南康郡王反闕而不載岐王德芳之裔惟敘子從照史傳作從照惟能子從贊
端臨載其爲温州團練使贈南陽侯而史傳則止爲內殿崇班惟憲子從演端臨載其爲登州防禦使贈遂寧侯
而史傳則止爲禮賓副使其惟敘孫世逸惟憲孫世奔惟能孫世瑞端臨皆云贈爵而史傳并闕其名惟憲子從
式既封安定郡公乃封從式子世恩爲楚國公以主德芳之祀此亦宜錄其事而端臨闕之漢王元佐之裔初以
允言之子宗說爲元佐長孫封祁國公皇祐中除名熙寧時以允升子宗惠襲封魏國公尋見黜以允言子宗立
嗣封傳載其傳仲來不儻彥清三世端臨皆未一載允升有子十三人傳言宗禮宗旦宗悌宗惠四人知名端臨
則載宗禮宗道宗楷宗回宗默宗秀六人并允升之孫仲翹一人與史傳顯晦互異且如元豐時封華陰郡王後
贈滕王之宗旦亦竟闕焉昭成太子元僖無子仁宗時以允成子宗保爲之後襲封燕國公端臨亦不載陳王元
份之長子允寧有子宗諤宗敏宗孟宗肅宗諤封虢國公進封豫章郡王宗肅封魯國公端臨止載宗敏宗孟
贈會稽侯宗孟史不言何封前考作贈臨汝侯而宗諤宗肅不列元份之次子濮王允讓其子宗暉神宗時嗣封濮王傳至不淩而止允
讓之長子宗懿封和國公前者皆載之與史傳合而允讓之次子宗樸封歧國公治平中改濮國公神宗時進濮
陽郡王宗樸薨宗誼襲封端臨考獨不載其爲越王元傑之後之宗望史以爲元佐之孫允言之子端臨則與宗
懿等並列爲允讓子世系亦多歧出鎮王元偓子允弼封北海郡王又改東平王其子宗續封韓國公宗景封濟
陰郡王曹王元偁再傳而無子以平陽懿恭王之子宗達爲後襲封蔡國公端臨皆不載周王元儼之子允迪史

言其無行詔絕朝請而前考云贈永嘉郡王至史言允良封華原郡王其子宗絳亦於熙寧中嗣封吳國公前考亦不載自仁宗一世故所闕軼不更補述凡此皆宣祖太祖太宗之裔端臨於諸親王下皆附載其子姓者而闕略同異之處指不勝屈何哉豈端臨著書時宋室譜牒或未能得觀歟抑修史者有舛訛歟續通考本斷自寧宗而下然既續端臨之緒且同屬宋代之事自不得遺漏故據正史追補所未備並爲之考證云

同姓封爵

遼東丹國人皇王倍太祖長子天顯元年封五年

時太宗即位之四年仍稱天顯年號

倍浮海適唐

天顯元年太祖破渤海改渤海國曰東丹名其輝罕城曰天福冊皇太子倍爲人皇王以主之賜天子冠服建元甘露稱制置相以皇弟達喇

爲左大相渤海老相爲右大相渤海司徒大素賢爲左次相耶律羽之爲右次相建臺省百官一用漢法歲貢布

十五萬端馬千匹太宗既立見疑以東平爲南京徙倍居之盡遷其民倍因浮海適唐

其追尊爲義宗事已詳帝系考

臣謹等按太祖第三子李胡太宗時冊爲太子薨後追尊爲帝第四子雅爾噶未封爵故皆不列以後各帝之子凡生前未膺封者皆不入正文

齊王雅斯哈太宗次子會同二年封太平王

表作元年誤

穆宗時以謀亂事覺貶戍景宗保寧元年召還封齊王保寧

四年薨

翼王迪里太宗第四子景宗保寧元年封乾亨初歿於陣

越王必攝太宗第五子景宗保寧元年封

表作穆宗封誤

後以疾薨

寧王長沒世宗第三子

當即實隆詳帝系考中

景宗時封王保寧八年奪爵除名聖宗統和元年復封

秦晉王隆慶景宗第二子乾亨二年封恆王聖宗統和十六年封梁國王開泰元年進封秦晉國王復以疾薨
齊王隆祐景宗第三子乾亨初封鄭王聖宗統和十六年封吳國王十九年封楚國王開泰元年徙封齊國王是
年薨

秦王重元聖宗第二子太平三年封餘見帝系考道宗清寧九年其子尼嚕古叛軍潰重元自殺

柳城郡王布古德聖宗第三子興宗重熙十七年封後討夏軍還薨

燕王武格聖宗第四子封年未詳後薨於南京

混同郡王海古勒聖宗第六子興宗重熙十七年表作七年誤封饒樂郡王道宗咸雍甲申封混同郡王八年薨

宋魏王和囉嚕興宗第二子重熙十七年封越王道宗卽位徙魯國王清寧時進宋魏國王道宗紀稱寧二年封宋國王其加魏國未

詳何後從獵於慶州薨

秦越王阿林興宗第三子重熙十七年封許王道宗卽位進陳國王清寧時進秦越國王清寧二年封秦國王其加越國不知何年大

安三年薨

梁王濬道宗子清寧九年封餘詳帝系考

晉王額嚕溫天祚帝第一子天祚六年封保大初縊死詳帝系考

梁王聶哱天祚帝第二子封年未詳餘見帝系考

燕國王達魯天祚帝第三子天祚三年由梁王進封早薨道宗紀云梁王達魯進封燕國王其封梁王表不載封年未詳

趙王錫訥埒天祚帝第四子天祚六年封饒樂郡王尋進封趙王後從天祚至泉灤爲金師所獲封趙王事紀文不載封年未詳

封郡王事
表亦不載

秦王定天祚帝第五子許王寧天祚帝第六子

封年未詳後俱至青冢樂爲金師所獲

臣等謹按同姓封爵先敘皇子之封而皇族之封後焉皇族及異姓之封皆以第一次受封年月先後爲序遼皇族中元祖子蜀國王葉木隋國王錫瞻德祖子許國王伊德寶皆係重熙二十一年追封故不列又遼時有南院大王北院大王乙室部大王奚六部大王耆百官志會同元年改額爾奇木爲大王北南二王其職視戶部與乙室部奚六部共爲四大部族則大王乃官名非封爵也

明王安圖德祖第五子太祖弟世宗天祿元年以之主東丹國賜號明王穆宗應歷二年薨臣等謹按太宗紀會同五年有明王溫恩考安圖字猥陰恩隱聲相似其時已有明王封號

泰寧王察克安圖子天祿元年封後以弑逆伏誅

燕王德哈六院額爾奇木博果濟之後天祿二年封後以弑逆伏誅

漆水郡王托雲孟父房之後天祿三年封穆宗應歷初薨

平王隆先義宗僖子景宗保寧元年封後討高麗軍還薨

荆王道隱義宗僖子保寧元年封蜀王乾亨元年徙封荆王聖宗統和初薨

吳王稍義宗僖子保寧元年封

宋王喜隱章肅帝李胡子初封趙王保寧元年封宋王六年以謀反廢賜死

衛王宛章肅帝李胡子保寧元年封

西平郡王賢適元祖之裔景宗乾亨初疾篤得請二年封旋薨

宋國王休格元祖之裔聖宗統和四年封十六年薨

漆水郡王耶律穆濟仲父房之後封年未詳聖宗統和六年有以漆水郡王穆統和未薨齊爲大同軍節度使之文傳中不載封郡王事

臣等謹按聖宗統和十二年又有封耶律景爲漆水郡王之文景無傳不可考其何系

魏國王察克秦晉國王隆慶之子聖宗開泰五年封中山郡王太平九年進封潞王興宗重熙二十一年進封越

國王道宗初進趙國王清寧二年徙封魏國王

幽王蘇克隆慶子聖宗開泰五年封樂安郡王後進幽王封年未詳興宗重熙十二年紀已有幽王蘇克之文疑亦太平中所進

陳王謝嘉努隆慶少子聖宗開泰六年封長沙郡王興宗重熙十七年進封陳王後又進魯王道宗紀清寧五年有魯王謝嘉努之年

文封年未詳

遼西郡王圖分漆水郡王蘇色皆隆慶子封年未詳

臣等謹按興宗重熙十七年紀有封旅曠爲遼西郡王事他無可考旅曠曾爲湯陰則是皇族可知且名字之音

相同當卽一人也故旅曠於興宗不再列

居王呼圖克齊國王隆祐子聖宗開泰三年封廣平郡王後進封周王太平三年紀有周王呼圖克之文封年未詳

魏王赫魯亦隆祐子封年未詳

三韓郡王宗範聖宗太平三年封紀云封皇姪宗範爲三韓郡王其父不可考皇族表中無此名

臣等謹按聖宗紀開泰八年以廣平郡王宗業爲中京留守當與宗範同輩無可詳考又自查葛至宗範凡七人

皆見於表紀而無傳故其薨時亦無可考矣

幽王華格孟父房之裔聖宗開泰二年封紀作二年尋削

楚王尼嚕古重元子興宗重熙十一年封安定郡王十七年進封楚王道宗清寧九年以叛誅

衛王塔布齊國王隆祐子初封豫章王興宗重熙十七年進漢王道宗清寧間進魏國王又進吳王又進衛王與

重元同叛削爵

晉王耶律仁先孟父房之後父魂引封燕王係追興宗重熙十八年封吳王興宗紀云十九年封道宗清寧四年

徙封隋王九年徙封許王尋進封宋王後又封遼王咸雍元年又徙封晉王八年薨

富春郡王義先仁先弟興宗重熙十六年封武昌郡王二十一年進封富春王未幾薨

漆水郡王達嚕噶會為惕隱則是皇族可知第不知何系興宗重熙十二年封

許國公耶律仙童仲父房之後道宗清寧時封蔣國公咸雍初徙封許國尋薨

國國公耶律哈里只六院額爾奇木博果濟之後道宗清寧七年封後致仕薨

漆水郡王實都興宗子和囉噶之子道宗太康七年封混同郡王額特塔許王伊德實之後道宗壽隆元年封漆

水郡王傳作太康中封今從紀天祚帝乾統初封混同郡王尋致仕薨

吳國公博迪季父房之後道宗太康中封大安中致仕薨

秦晉國王渚興宗子和囉噶之子初封北平郡王天祚帝乾統元年進封鄭王三年進越國王六年進魏國王天

慶五年進封秦晉國王餘詳帝系考

臣等謹案以上同姓之封皆據紀表列傳考正但遼時皇族與民族皆有耶律之姓史所書某院部人則同姓不
宗之民族仍宜列入異姓者也史筆多疎每有不能辨其爲同異姓者如聖宗開泰二年封耶律昆爲國王太平
三年封耶律哈噶爲漆水郡王太平四年有漆水郡王迪里之名不知即太祖子雅爾道宗卽位時有宿國王陳
留王圜魯曾孫未知何據與陳王圖伯特進封吳王之事疑是同姓重元叛逆之黨中有陳國王陳六大安四年封耶
律阿蘇爲漆水郡王後封趙王又耶律哈里傳云令公巴爾岱之長子封漆水郡王傳中不言其系此疑是同姓太祖弟塔克之子曰巴爾岱

恐此處援字有訛但巴爾岱傳文又無爲令公之事此則紀傳中皆無可考其世系者故類誌於此

晉王耶律隆運本姓韓名德讓聖宗統和四年封楚國公七年封楚國王後進齊國王十九年賜名德昌二十二
年皇太后賜姓耶律徙晉王出宮籍籍橫帳季父房後位親王上二十八年賜名隆運二十九年薨

臣謹等按隆運本異姓然改籍橫帳且營衛志載隆運無子以魏王塔布子葉嚕爲嗣天祚帝又以晉王額嚕溫
繼之終遼之世直以同姓之最親者視之較耶律仲禧之賜姓親疏亦迥異矣故列入同姓之末

漆水郡王耶律制心隆運之姪聖宗開泰六年封太平中徙封燕王

臣等謹按聖宗紀開泰九年有漆水郡王韓懋爲南京留守制心本姓韓懋字卽制心二字之誤

漢王耶律達魯隆運弟德威之孫興宗重熙初封漆水郡王十九年改封混同郡王道宗清寧初徙封鄧王後更
封漢王太康中薨

異姓封爵凡姓耶律而非皇族者亦俱列入此類

魯國公韓延徽太宗時封穆宗應曆九年卒

魏王趙延壽太宗初封燕王會同初封魏王世宗天祿二年卒

挹郡開國公高模翰太宗會同間封穆宗應歷九年卒

鄭國公耶律舒嚕南京人聖宗統和八年封

秦王高勳世宗應歷初封趙王景宗保寧元年封秦王八年除名

趙國公韓德樞延徽子當在穆宗時封封年未詳景宗保寧元年卒

魏王蕭思溫景宗保寧元年封從帝獵闔山爲賊所害

鄴王韓匡美初封魏國公景宗保寧二年進封

彭城郡王劉繼文繼文漢將也與宋戰敗漢亡來奔景宗乾亨元年封

秦王韓匡嗣耶律隆運父初封燕王景宗乾亨元年十二月降封秦王二年卒

楚國公耶律鴻觀約足氏之後聖宗統和十三年封開泰初卒

蘭陵郡王蕭達林聖宗統和十四年封二十年伐宋卒

韓王耶律舒嚕六院部人聖宗統和二十九年封

岐王耶律世良六院部人聖宗開泰二年封五年卒

蘭陵郡王蕭寧聖宗開泰元年紀有北宰相駱馬蘭陵郡王蕭寧之文封年未詳

幽王蕭排押聖宗統和未封蘭陵郡王開泰五年進封東平郡王太平三年封幽王尋卒

臣等謹案蘭陵郡王蕭寧惟見於聖宗之紀餘無可徵至開泰八年紀又有東平王蕭韓寧之文韓寧當卽寧也

其二次封號與排押相同封年亦為近似但紀有韓宣與排押同征高麗之事則的是二人也以列傳考之遼之封號不妨同時重複耳

楚王王繼忠聖宗開泰五年傳中脫年號以時考之當是開泰五年封琅琊郡王六年進封楚王賜國姓太平三年致仕卒

嫩煌郡王曹順回鶻人沙州節度使聖宗開泰八年封

蘭陵郡王丁振聖宗太平三年封

齊王蕭孝穆聖宗太平三年封燕王十年封東平王傳缺載封東平事從紀增興宗卽位徙秦王重熙六年進吳國王九年徙

楚王十一年徙齊王尋卒

陳王張儉聖宗太平六年封韓王興宗立徙封陳王重熙十二年卒

蘭陵郡王蕭必塔排押子聖宗太平十年封欽哀皇后攝政被殺

晉王蕭布古興宗初卽位時紀文有此人名餘無可考封年未詳

魏王蕭朴聖宗太平中封蘭陵郡王進恆王興宗重熙初改韓王又改楚王四年改魏王尋卒

晉王蕭孝先孝穆弟興宗重熙初封楚王四年徙晉王

趙國王蕭貫寧興宗重熙十年紀有此人名餘無可考封年未詳

豐國王蕭孝友孝穆弟興宗重熙元年封蘭陵郡王八年進陳王十年進吳王後進趙王燕王秦王道宗清寧初

進封豐國王坐子胡觀逆謀伏誅

楚王蕭孝忠當亦是孝穆弟興宗重熙十二年封

魏國王蕭惠聖宗開泰二年封魏國公興宗初進鄭王後重熙六年徙趙王後又徙封齊王進韓王十九年封魏國王道宗清寧二年卒

陳王蕭敖拉孝穆子興宗重熙二十一年封西平郡王道宗清寧元年進封韓王二年徙封陳王後爲蕭革所譖帝縊殺之

鄭國王蕭革興宗重熙二十一年封吳王進鄭王道宗清寧四年更封楚王八年進楚國王後封鄭國王以附重元之亂伏誅

武寧郡王蕭薩巴孝穆子興宗重熙末封道宗清寧初卒

鄭王蕭錫里庫惠之弟興宗重熙二十一年封

虛列之名附見蕭惠傳

遼西郡王楊哲道宗清寧初封趙國公成雍初徙封齊國又改封晉國又改封趙國太康五年例改遼西郡王旋卒

臣等謹按道宗紀太康五年詔惟皇子仍封一字王餘並降削故一時楊哲伊蘇及蕭韓嘉努皆降封也

遼西郡王楊續初封趙王太康中例降遼西郡王致仕卒

臣等謹按道宗紀太康五年降封者止載楊續無楊哲名二人皆有傳然其歷官彷彿相同續與哲音亦相似細按當是一人而誤作兩傳今姑存疑依傳列之

蘭陵郡王蕭韓嘉努道宗清寧初封韓國公進封蘭陵郡王九年進封荆王太康初徙封吳王五年仍例降蘭陵郡王韓卒

漢王蕭德道宗清寧元年封魯國公九年進封漢王咸雍時卒

混同郡王耶律伊蘇五院部人道宗清寧五年封趙王九年進魏王太康五年例降混同郡王以罪伏誅

韓王蕭唐古見咸雍三年紀文封年未詳

柳城郡王蕭珠展道宗清寧十年封咸雍時卒

陳國公張孝傑道宗咸雍八年封後以罪削爵

趙王蕭必將哩道宗太康二年封

遼西郡王蕭額哩頁啟拉子道宗太康二年封

柳城郡王蕭錫默道宗太康二年封

臣等謹按必將哩額哩頁錫默皆以后之父與叔得封此專因外戚而貴者然止此數人不再立外戚門

蘭陵郡王蕭烏納一名纏不也道宗紀太康五年所封即烏納也道宗太康五年封天祚帝天慶中卒

韓國公耶律仲禧本姓李道宗咸雍八年賜國姓封傳作六年封今從紀

漆水郡王儼仲禧之子道宗壽隆初封越國公天祚帝乾統三年徙封秦國六年改封漆水郡王天慶中卒

蘭陵郡王蕭綽哈必將哩子道宗太康五年封尋以事除名

陳國公寶景庸道宗太安初封九年卒

蘭陵郡公蕭阿嚙帶道宗壽隆元年封天祚帝乾統時卒

蘭陵郡王蕭德勒岱天祚帝天慶三年封國亡後死

蘭陵郡王蕭泰先天祚妃之兄也天祚帝時封以罪賜死

臣等謹按遼代耶律與蕭世為婚姻凡蕭氏封爵之人無一非戚畹也但蕭氏實世世與其國事其中一無功業僅以外戚封者固有而實緣勳業得封非由恩澤者亦不少王圻續通考概列之外戚固屬非宜若以一族之人分為異姓外戚二門亦滋煩瑣故統列於異姓焉 又按王圻續通考有外國封爵如冊石敬瑭為帝諸事乃一時南北朝大勢使然豈可降為封建之制西夏亦各為一國非可以分茅列土論故竟從刪

金熙宗天眷元年定封國制

臣等謹按紀文止此一語其詳不可考大約與皇統中所定相同耳

皇統二年定制皇兄弟及子封一字王者始祖以下子孫品傳亦有此為親王給二品俸餘宗室封一字王者以

三品俸給之 親王正一品錢粟二百二十貫石郡王在從一品減二十貫石麴米麥各三十五稱石郡王減五稱石春衣羅三十五

疋秋衣綾三十五疋郡王各減五疋春秋絹各二百二十疋郡王減二十匹綿六百兩郡王減百兩正二品錢粟一百五十貫石麴米

麥各二十二稱石羅綾各二十二疋絹各八十疋綿三百五十兩正三品錢粟七十貫石麴米麥各十六稱石羅

綾各十二疋絹各五十五疋綿二百兩

臣等謹按詳繹志文舊制親王支正一品俸郡王支從一品俸當即天眷初所定至此則定支二品三品俸也又

章宗即位時詔親王到任各給錢二十萬互見職官考

海陵正隆二年改定親王以下封爵等第詳見帝系考皇族門封王大國號二十曰遼梁宋秦晉漢齊趙越殷楚魯冀豫

唐堯吳蜀陳曹次國三十曰隋鄭衛韓潞幽藩岐代虞志誤徐滕薛紀原邢翼豐畢鄧鄆霍蔡瀛按金格葛當在此沂荆

榮英壽溫小國三十曰濮濟道定景後改申崇宿昔葛鄴舒溜郅宗鄧郅杞
國應國爲杞國今國名無應當是改紀矣而英與
國號有英國應國故改英國爲壽

壽兩存豈海陵之後仍不諱英且與壽國並列歟
向郇密胙任戴誌誤韋萬蕭莘芮封王之郡號十曰金源廣平

平原南陽常山太原平陽東平安定延安

章宗明昌二年勅有司國號犯昔有天下者之號不得封臣下 有司議以遼爲恆梁爲邵宋爲汴秦爲鎬晉爲

并漢爲益齊爲彭殷爲譙楚爲郢唐爲絳吳爲鄂蜀爲夔陳爲宛隋爲涇虞爲澤

臣等謹按宗後改萊避宗峻與睿宗之名也郇後改管興定二年避宣宗嫌名也葛又改蔣考章宗元妃李氏傳

曰葛王世宗初封六定後不以封臣下由是三等國號無葛及皇子德里封葛王尙書令奏請於瀛國下附葛國

號從之則知葛之改蔣在大定後事也原後改昇濟後改遂史無明文當是章宗曾爲原王故同葛改蔣之例濟

則當是避衛紹王之名耳

同姓封建

梁宋國王宗幹太祖庶長子海陵之父熙宗天眷二年封皇統元年薨餘詳帝系考

越國王宗弼太祖子熙宗天會十五年封藩王天眷二年進封越國王皇統八年薨

克國王宗雋太祖子熙宗天眷元年封陳王二年進封克國王以謀反伏誅

衛王宗強太祖子熙宗天眷元年封紀王三年進封衛王皇統二年薨

臣等謹按傳云天眷三年進封衛王而熙宗紀皇統元年六月仍書紀王宗強薨封號與薨年皆小有互異

曹國王宗敏太祖子熙宗天眷元年傳作三年誤封邢王皇統三年封曹國王海陵時被殺

任王威和太祖子熙宗皇統六年封海陵天德二年被殺

臣等謹按太祖子趙王宗傑宋王宗望考本傳皆係薨後追封太宗紀天會五年書漢國王宗傑薨傳無漢國封號但以

前無封國事餘如豐王烏里藩王額魯圖王鄂爾多紀王實納塔息王寧吉葛王燕孫鄴王布古七人皆無傳封

年未詳惟熙宗紀皇統六年有封太祖子孫爲王之語而是年正月又專書封威和爲王無餘人名則此七人疑

與宗傑宗望皆係追封故皆不列

宋國王宗磐太宗子熙宗卽位封天眷二年以謀反伏誅

幽王宗固太宗子熙宗卽位封代王宗雅虞王阿魯補滕王呼沙呼薛王宗懿陳王宗本翼王呼蘭豐王宗美鄆

王神土門霍王哈必蘇蔡王沃哩冀王宗哲徐王宗順皆太宗子熙宗天眷元年封天眷二年呼蘭以謀反伏誅

宗雅宗懿宗本宗哲皆爲海陵所殺

臣等謹按宋國王宗磐之號與宗固之封爲王皆見於熙宗初卽位之紀餘人封爵雖紀傳中無一一指名然紀

云天眷元年封太宗子斛魯補等十三人爲王據紀文宗固已於前一年封而當世宗大定二年追封太宗子十

人爲王特其封號皆與表中所書不同則表必係據熙宗時所封者書之明矣熙宗天眷二年紀又書降封太宗

諸子蓋因宗磐呼蘭謀叛之故皇統二年八月又書復太宗子呼嚕爲王宗固本名胡疑當時復王者或不止呼

嚕一人史略之耳海陵時宗雅四人被殺之外其時太宗子孫死者七十餘人則諸王固皆不免矣

魏王道濟熙宗子皇統三年封未幾被殺

臣等謹按熙宗子濟安封皇太子已見帝系考故不列凡歷代冊封皇太子皆不載入此門